

დროშა

სურათებიანი დამატება

გაზეთის № 266

კვირა, 29 ნოემბერი 1909 წ.

დამატების № 47

ტკბილი ღუღუკი.

(შემდეგი*)

6.

ჩემ ძველ ნაცნობებში ერთი ისეთი ოჯახი ერია, რომელსაც არ ეკუთვნოდა არც დაბალ ხალხს და არც შუათანას, არც ხელოსან-ვაჭრების წრეს, არც მოხელეებისას, ჩუღუკეთში სცხოვრობდნენ, ხევის პირას. იქ საკუთარი ქონება ჰქონდათ. დიასახლისი მშრომელი იყო, წესიერი, ოჯახისათვის თავადებული. ერთი ქალი გათხოვილი ჰყავდათ ვიღაცა გადამწერალზე; მეორე, ქეთეთო, ესე ჩვიდმეტ-თვრამეტი წლისა იყო; დიასახლისი თხელი ქალი იყო, სუსტი აგებულობისა; კაცი ბრგე, წარმოსადეგი, ევროპული ტანისამოსი ეცვა, შეხუნებული. ოდესმე გადამწერად ყოფილიყო სადღაც სამდივნოში, შემდეგ ბაზრის ზედამხედველის ჯაჭვი ეგდო კისერზე, ერთხელ წყლის მილის მეთვალყურედ იყო, ხან სამსჯავროში დადიოდა მოსყიდულ მოწმად ან რომელიმე აბდალ გლეხის ვეჭილად. კეთილშობილად რაცხდა თავს, რადგან აზნაურობის მაძიებელი იყო, თარი კარგი იცოდა, ქეიფი თავადური. ვაი, რომ წელი არ მოსდევდა! ფუყი კაცი იყო, აგორებული. იმდენსაც ვერა შოულობდა, ტანზე მიეკრა რამე. თუ არა საკუთარი სახლი და დიასახლისის მხნეობა, გაუჭირდებოდა ყოფნა. ქეთეთოც ეხმარებოდა დედ-მამას. თუმცა სუსტი იყო, ხელსაქმეში თუ სახლის სარისტში არ ჩამოუვარდებოდა დედას. ქმრის ნაცნობ-მოსადევარი დაბალი მოხელე იყო ან ფუჭეჩა აზნაური, მისი ცოლის ნაცნობ-ნათესავი-კი — ხელოსანი თუ ვაჭარი ხალხი.

მე იმ ოჯახს აღრიდანვე ვიცნობდი, რადგან ბავშვობიდან იმ უბანში გავიზარდე. მაშინაც არ შევწყვიტე მასთან კავშირი, როცა სამსახურში შევედი. ტკბილად მიღებდნენ, უხაროდათ ჩემი მისვლა. ხშირად კი არ დავდიოდი მათთან.

იქნებ სულაც მიმეტოვებინა ისინი, თუ გული არ დაეხვია ჩემთვის ქეთეთოს: იმ ქალის გვერდზე მყუდროობასა ვგრძობდი, სულის სიშვიდეს. როცა ჰკერავდა რასმე, ან ჰქარავდა, თან დაპლიღინებდა და ეს ნაღვლიანი ლიღინი მოქმედებდა ჩემზე დამამშვიდებლად. დაღონებული თვალები ჰქონდა, წარბები რკალევივით მოსჯაროდნენ ზედ; დაშვებული გიშრის წამწამი დაწვებამდის სწვდებოდა. მთელ მის სახეს ყოველთვის დარდის ზეწარი ჰქონდა გადაბურული. ხანდისხან ახლგზდა გუგას, მთლად გააღებდა თვალებს და გადმოგხედავდა ერთ წამს; მაშინ განცვიფრება რამ მოსჩანდა მის თვალთა სიღრმეში.

მხოლოდ ღიმილი შემინიშნავს მის ზაგეზე, არ მახსოვს გაცინებულ-გადახარხარებული. ხანდისხან საქმე ხელში გაუჩერდებოდა და რამდენსამე წუთს გასცქეროდა სივრცეს, თითქო რასმე ჰხედავდა იქ, რალსაც უღიშოდა. იცოდა წერაკითხვა, რუსულს ახერხებდა. მაკვირვებდა მისი დალაგებული მსჯელობა, გეგონებოდა ცხოვრებისა და წვრთნისაგან დაბრძობილ გონებასთანა გაქვს საქმეო. გულ ჩვილი იყო: მისი კარიდან გლახაკი გაუკითხავი არ გაბრუნდებოდა.


ტკბილად და თავაზიანად რომ მიღებდნენ, იქნება რამ აზრი ჰქონდათ ჩემ შესახებ, მე კი გულუბრყვილოდ ვყავი მათთან და ნაცნობობის მეტი არაფერი აზრი არ ჩამიდვია გულში მათ შესახებ: ქეთეთო ვნებათა დელვას არ იწვევდა ჩემში და, გარდა ამისა, მე მეუღლეს უფრო მალლა-მალლა და შეძლებულ ოჯახებში ვეძებდი. დასავით ვუყურებდი ქეთეთოს, მფარველობით დაგყურებდი თავს. ბევრჯერ თვეობით მივატოვებდი მათ ოჯახს, თუ გართული ვიყავი და ბედნიერად ვგრძნობდი თავს. მხოლოდ მაშინ მომავონდებოდნენ ჩემი ძველი ნაცნობები, როცა რამე უსიამოვნება ამიღელვებდა გულს.

მახსოვს, კვირა დღე იყო, ჩვენი სამმართველოს უფროსს ნადიმი ჰქონდა და მეც იქ ვიყავ სადილად. თავისი ყადარი სტუმრები მიეწვივნა: მაღალ განათლების მექონნი, დაწინაურებულ ხარისხისა, წარჩინებულ შთამომავლობისა. თურმე ზევიდან დამცქეროდნენ, ჯერ ვერ ვიგრძენი ეს და ხასად ვიქცეოდი: თავს ვეველებოდი ქალებს რაინდულად, მივდგებ-



ნატალია მერაბ გაბუნიას ასული ცაგარლისა. დღევანდელ იუბილეის გამო.

*) იხ. სურათებიანი დამატება № 46.



ალექსანდრე ჰაირაპეტის ძე ქალანთარი.

30 წლის იუბილეს გამო. ეს იუბილეი კავ. სასოფლო-სამეურნეო საზოგადოებამ გადაიხადა 21 ნოემბერს ტფილისში.

მოვლგებოდი გაბედვით, თავმოწონედ ვიგრებდი უღვაშს, სადარბაზო ღიმილი მიქროდა სახეზე. სადილად როგორღაც სუფრის ბოლოზე მომაქციეს, სადღეგრძელო ბოლოს და დღიეს და თამადა თითქო დაცინვის კილოთი შემეხო. ავენთე. იქნება კიდევ მომეჩვენა ყველა ეს და ჩემმა გაროზობამ დამიგო მახე ცუდ გუნებაზე გავხდი. გამოვეთხოვე და ჩემ ნაცნობებთან წამოველ.

სამოვარს ესხდნენ გარს. კაცი შინ არ იყო მომესალმნენ. დაღამდა დერეფანში მთვარე შემოდგა. ქალმა დაღონება დამატყო და თარი ჩამოიღო: იცოდა, რომ მისი სიმღერა და სიმთა ხმა კაეშანს უკუემყრიდა. ჩამოჰკრა სიმებს, შეხედა მთვარეს და დაჰმღერა მნათობის სადიდებელი რამ ჰიმნი. ჩავხედე თვალებში ქეთეთოს, ყური მივუბყარ იმის ხმის წკრიალს და ბინდი ჩამომეცალა თვალთაგან: მის თვალებში, მის შეხედვაში, მისი ხმის ბგერაში ვიცანი სწორედ ის თვალები, სწორედ ის ხმები, რომლებიც ბავშვობიდანვე ელანდებოდნენ ჩემს მეგობარს. გავნცვიფრდი. გადავწყვიტე, უთუოდ გამეცნობე მინა ეს ოჯახი მიხასათვის. ჩამოვადე ლაპარაკი ჩემს მეგობარზე, შევაქე იგი ყოველმხრივ და ვთხოვე, ნება მოეცათ მიმეყვანა მათთან. დამთანხმდნენ, თუმცა უგემურად. ქალმა ხმა არ ამოიღო, მხოლოდ წამწამთა დასი დახარა დაბლა და ამოიოხრა.

7.

როგორც იყო დავითანხმე მიხა და წავიყვანე ჩემ ნაცნობებთან. გამოუსვლელი კაცი იყო, მოკრთალებულ-მორიდებული და უძნელდებოდა სხვა ოჯახში შესვლა, ახალი ხალხის გაცნობა. საღამოხანზე წავედით. კინალამ გზიდან გამექცა. როცა სახლი დაინახა, გამხნევდა, გამამაცდა, რადგან სახლი უბრალო იყო და მიხვდა, რომ განდიდებულ

ოჯახში არ მიმეყვანდა იგი, სადაც შეიძლებოდა რამე უხერხულობა ეგრძნო. დიასახლისმა ისე გულიანად მიგვიღო, ისეთ ტკბილად მოგვესალმა დალოცვილი, რომ მიხამ მაშინვე თავისუფლად ამოისუნთქა. ხელოსნის ქალი იყო და მალე მიხვდა, როგორ უნდა მოჰქცეოდა ახალ ნაცნობს, ან რაზე უნდა ესაუბრა მასთან. მე ის მაფიქრებდა, როგორი თვალთ შეხედავდა მიხა ქეთეთოს, ისევ ცივად მოეპყრობოდა, როგორც სხვა ქალებს, თუ რასმე მიმზიდველს აპოვიდა იგი მასში და მიამსგავსებდა იმ საიდუმლო არსებას, რომელიც დიასახული ჰქონდა ოცნებაში და რომელიც ბავშვობიდანვე იზიდავდა მას.

ქალი მეზობლისას ყოფილიყო. გაგზავნეს დასაძახებლად მალე შემოვიდა. ხელი ჩამოვართვი და მივმართე:

— ეს მიხეილი გახლავს, ქალო, ჩემი გულითადი ძმობილი და ბიძაშვილი!

ქალი მიბრუნდა მიხასაკენ და თავისებურად შეანათა თვალები. მიხამ ფეხი წამოდგა შესაგებებლად, მაგრამ ძლივს მოახერხა ხელის ჩამორთმევა. სიტყვა ბაგეზე შეაშრა. უხერხული წუთი იყო. ჩავერიე, გავიცინე, ცნობაზე მოვიყვანე ახალგაზრდა. ისევ გაება საუბარი. როცა ქალი ლაპარაკში ჩამოერია და მიხამ იმის ხმას მოჰკრა ყური, უფრო აღელდა, გაფითრდა. დიასახლისმა მსწრაფლ შენიშნა უხერხული მდგომარეობა სტუმრისა და მარჯვედ დაუარა თავს, არ აფიქრებინა, რომ ჰხედავდა იმის მღვღვარებას. მიხაც თანდათან დაწყნარდა, იმის თვალებში ისევ დაისახა აზრი, მისი ქცევა გონთა მყოფ ადამიანის ქცევას დაეგვანა. ეს კი იყო, რომ თვალი ვეღარ მოსწყვიტა ქალს. მოგვართვეს ჩიი, მურაბები, ხილი. ვთქვით ამ მთისა თუ იმ მთისა, ვისაუბრეთ შინაურებზე თუ გარეულებზე. ქეთეთო დაღონებული მეჩვენა. ახალ ნაცნობის უხერხულმა ყოფამაც კი ვერ მაიზიდა მასი ყურადღება. მხოლოდ ერთხელ გაეღიმა იმის უცნაურ ქცევაზე. ვატყობდი, რომ ჩემკენ იწევდა ქალის გული, თითქო ნუ-



ნატალია ცაგარლისა ხანუმას როლში („ხანუმა“)

გეშის ცემას გამოელოდდა ჩემგან. ვერ გამეგო, რა აწუხებდა ქალს, ან რას დაეჩაგრა მისი გული, მაგრამ რომ ჩემკენ იყო დახრილი მისი არსება, ამას კი ცხადდა ვგრძნობდი. კა-

ცი შინ არ იყო. ბატონ ივანე ივანეს ძესთან არისო, მიი-
ხრეს.

— ამ ბოლო დროს ძალიან დაუახლოვდა ივანე ივანეს
ძეს, სულ ერთად არიან. ჩვენთან ხშირად დაიარება ის,—
მიიხრა დიასახლისმა.



ნატალია ცაგარლისა ხამფერას როლში („ხათაბალა“)

— ისევ სტოლის გამბეგელია, თუ რამ ახალი წარმა-
ტება მიიღო?

— რაღაც ჩინი მოხვლია, სამსახურში წარმატებას მოე-
ლისო.

— ისევე სვავს?

— ხანდისხან. იმდღეს ამბობდა, რაკი სახლობას მოვე-
კიდები, სმას სულ ავკრძალავო.

ამ კაცის ხსენებაზე ქალი შეწითლდა და უსიამოვნების
ჩრდილმა გადურბინა სახეზე. შევწყვიტეთ ამ საგანზე ლაპა-
რაკი. მღუმარების ანგელოზმა ჩამოიარა. რომ დამერღვია
უხერხული ღუმელი, ვთხოვე ქალს რამე ემღერნა თარზე.
ამისრულა თხოვნა: აკი გითხარით, ჩემკენ ჰქონდა მეთქი გუ-
ლი. მომართა თარი და დააწვევიალა. რაღაც სევდიანი ჰან-
გი დამღერა. სიმთა წყნარი ჟღერა გადაეხვია ქალის ნაღვ-
ლიან ხმას, ჩაეკსოვა, ჩაეწნა. ეს ხმები გარს შემოეხვივნენ
ჩემს გულს, დაჩაგრულს, და მძლავრად მიმზიდეს ქალისაკენ.
ქვეყანა დამვიწყებოდა, მისი ხმისათვის მენაცვალეებინა ყველა
არსი, თვალთ ცრემლი გადმომდგომოდა. გათავდა ხმები,
გამოვერკვიე გრძობებს, შევხედე ჩემს მეგობარს და ელდა
მეცა: ფეხზე იდგა გაფითრებული, თვალე დაკარგული, მარ-
მარილოს ქანდაკებად ქცეულიყო, დედა-შვილმა შენიშნეს
ეს საკვირველი ყოფა სტუმრისა, მაგრამ რადგან სიმღერის
ძალას მიაწერეს, არ ეჩოთირათ, სასიამოვნოდაც დარჩათ.

წამოვიყვანე ამხანაგი: მეშინოდა არა წამოროშოს რა
და უფრო მეტს უხერხულ მდგომარეობაში არ ჩამავდოს
მეთქი. გამოვეცდით თუ არა სახლს, მიხამ შემაყენა და ჩამ-
ჩურჩულა საიდუმლოდ:

— ის არის, ძმავ, ის!

— ვინ ის?

— ის, დათიკო, ჩემი მეუღლე!

— რას ამბობ, კაცო, ქეთეთო შენი მეუღლე რად იქ-
ნება?! ვუთხარ მე უკმხად და გამოვეტრიალდი.

მიხამ რომ ქეთეთოს თავისი მეუღლე უწოდა, თავისი
ცოლი, მე გულში ტკივილი ვიგრძენი, შურმა და სიავემ
ამიტანა, თითქო ჩემს ვისმეს შეჭხებოდეს იხ მოუხეშავად.
იმისთვის მომივიდეს, რომ ჯერ ისევ იმ თბილ გრძობის
გავლენის ქვეშ ვიყავი, რომელიც აღძრა ჩემში ქალმა. ახ,
წუთიერი იყო იგი გრძობა და წარმავალი! მე ქეთეთო ჩემ-
თვის არ მინდოდა: აკი ვთქვი, მეუღლეს სხვაგან ვეძებდი
მეთქი და სხვანაირს. მე მიზნად მქონდა დადებული განდი-
ლება და გამდიდრება, ხოლო ჩემს შეუღლებას ერთ-ერთ სა-
შუალებად ვსთვლიდი ამ მიზნის მისაღწევად. მაშინვე ვიგ-
რძენი ეს ყველა, სწრაფად მოველ გონს და შევიანე, რომ
უმიზეზოდ გავათახსირე და დავჩაგრე ჩემი მეგობარი, მაგრამ
ალარ მოვისურვე მისკენ მიხედვა: ბოროტი სქარბობდა იმ
ჟამს ჩემში, მაშინ ხასიათის სიმტკიცე მეგონა ეს უგვანი
ქცევა და უგულობა.

8.

ოთხმა-ხუთმა დღემ გაიარა და ჩემი მეგობარი თვალთ
ველარ დავინახე: თითონ არ მოვიდა ჩემთან და მეც ველარ
წავედი, რადგან არ ზეცალა, თორემ ის წუთიერი უსიამოვნ-
ნობა მაშინვე გაქრა, კიდევ დამავიწყდა. ველარც კი გამეგო,
რად ავენთე მაშინ ისე უეცრად და უაზროდ. მიკვირდა, რომ
იმ საღამოს წუთიერ გრძობას ავეყვი და მეგობარს გული
ვატკინე. ვინ მე და ვინ ქეთეთო ან თუნდ-მიხა?! იარონ
იმათ თავიანთ გზაზე! მე ჩემი გზა მაქვს, საკუთარი და ჩემი
მიზანი.

ის იყო თათმანი გავისწორე და ცალ ქუსლზე შემოე-
ტრიალდი კარებისაკენ. როდესაც გაიღო კარი და ფეხაკრე-
ფით შემოვიდა მიხა.



ნატალია ცაგარლისა ქიჩქინეს როლში („ქორ-აღლი“)

— უდროვით შემოვედი, წასასვლელად გამზადებულხარ.

— რა უშავს! მარტო ვიყავი, მომეწყინა და გავლა
მოვისურვე, თორემ საქმე არა მაქვს რა.



ნატალია ცაგარლისა ფროშარის როლში („ორი აბოლი“)

— იქნება ნაცნობებში მცდობარ, ან ქეთეთოსთან?—შემეკითხა მიხა და ექვიანად შემომქედა.

— არსადაც არ მივდივარ ნაცნობებში! რა მინდა ქეთეთოსთან? სასეირნოდ მივდიოდი და თუ გინდა ერთად წავიდეთ.

— შენ წადი! მე არ მებალისება სეირნობა, გული არა მაქვს. მერე როდისმე შემოვივლი.

დავაკვირდი ახალგაზრდას. გატანჯულ სახეზე შიში რამ აღბეჭდოდა და კრძალვა. რიდაცის თქმა უნდოდა, ვერ კი ბედავდა.

— როგორი გატანჯილი სახე გაქვს, კაცო?! რაღაც გაწუხებს, არ კი მეუბნები.

— არაფერსაც არ გიმაღავ! შენც კარგად იცი, რაც მალონებს და მტანჯავს.

— ქეთეთოს სახე ხომ არ დაგაჩნდა დალად მაგ დამწვარ გულზე-

— რას დამცინი?! იმდღესაც გამიწყერი და გამობრუნდი. თუ შენთვის გინდოდა ის ქალი, რაღაც გამაცან და ჩასდექი ჩემ ცოლდაში?

ისე გულმტკიცუნულად მითხრა მიხამ ეს საყვედური, რომ ვიგრძენი, რა ძნელი იყო მისთვის ეს ამბავი და ამისთვის გადაქრით ვუთხარი:

— არა, ძმაო, მე არც შეყვარებული ვარ, არც ჩემთვის გამოველი ქეთეთოს, თორემ აქამდისაც გადავიწერი ჯვარს. ვითომ რა დაიშლიდა?

— რა და რა! ქალს უყვარხარ, ბედნიერო.

— როგორ შეატყე, გულთმისანი ხომ არა ხარ?

— შეყვარებხარ ქეთეთოს, მაგრამ შემცდარა: ჩემი ბედია ის, ჩემთვის არის გაჩენილი.

— გამოგონე! მე ქეთეთოს შემრთველი არა ვარ, ის არ არის ჩემი საფერი. მომწონს კი ქალი, დად მიმაჩნია და გამეხარდება, თუ შენი მეუღლე შეიქმნება,—ვუთხარი მე მტკიცედ, თუმცა კი იმ წუთში გული აღარ დაეთანხმა გონებას: გრძობა მომიჩვილდა, როცა მიხამ მითხრა—უყვარხარო. ეჰ, ჯერ კიდევ არ ვიცოდი მაშინ, რა იშვიათი მარ-

გალიტი ყოფილა წრფელი სიყვარული მხოლოდ უგვანი ადამიანი დასთრგუნავს მას. მიხა ერთხანს დამაკვირდა ექვიანად და გადამეხვია.

— მართალს მეუბნები? რა კარგი ხარ! რა კეთილი ხარ! რა ბედნიერი ვარ!

— ისე უეცრად როგორ შეგიყვარდა, კაცო, ის ქალი?

— უეცრად კი არა, ეგ ის ქალია, რომელზედაც მე გელაპარაკებოდი. ეგ უწინვე იყო ჩემი მიუღწევი, მაგისი ხმა და თვალები აღრიდანვე მახსოვს, მხოლოდ სახის იერი და ტანადობა ველარ წარმომედგინა. აკი ავიწერი ხოლმე მაგის თვალებს, განიშნებდი მაგის ხმას.

— იცი, მიხა, მაგისთანა უცნაურ ლაპარაკს იქ მინც თავი დაანებე, თორემ ვერაფერს გაიგებენ, შენი სიტყვა შეაკრთობთ და ვერ მიადწევენ საწადელს

— თუ ვერ მივალწევ საწადელს, თავს მოვიკლავ! ისიც დაიღუპება მაშინ. მაგრამ ამაო შიშია: ქეთეთოს გული მიცნობს მე, შემიერთდება ისევ და მაშინ გამინათდება ცხოვრების გზა ბნელი.

მიხა იდგა ერთს წამს გაჩუმებული და პირს ღიმილი უქროდა. მისი გონების თვალის წინ ქრელი რამ ჩვენება გამოასახულიყო და მას შესტრფოდა იგი, მას შეჭხაროდა იგი. იმ წუთს არც კი ჰგრძობდა, სად იყო და ვისთან.

— მიხა! არ გინდა წავიდეთ ქეთეთოსთან? ხვალ საღამოზე თავისუფალი ვიქნები და წავიდეთ,—გამოვარკვიე იგი ოცნებიდან.



ნატალია ცაგარლისა ახალგაზრდობაში.

— წავიდეთ, შენი ქირიმე! იცი, დათიკო, ველარ მომიგონია, რა ერქვა მაშინ ქეთეთოს, თუმცა ენის წვერზე მადგა ის სახელი.

გ. ბარნოვი.

(შემდეგი იქნება)

